

ATODLEN 1

(a gyflwynir gan adran 13)

FFIOEDD A THALIADAU

Pŵer i ddarparu ar gyfer ffioedd neu daliadau: swyddogaethau newydd

- 1 (1) Caiff Gweinidogion Cymru wneud darpariaeth drwy reoliadau ar gyfer codi ffioedd neu daliadau eraill, neu mewn cysylltiad â chodi ffioedd neu daliadau eraill, mewn cysylltiad ag arfer swyddogaeth (“y swyddogaeth berthnasol”) sydd gan awdurdod lleol yn rhinwedd darpariaeth a wneir o dan unrhyw un neu ragor o'r adrannau a ganlyn—
 - (a) adran 3 (pwerau i wneud darpariaeth sy'n cyfateb i gyfraith uniongyrchol yr UE);
 - (b) adran 4 (pwerau i ailddatgan deddfiadau sy'n deillio o'r UE);
 - (c) adran 5 (pwerau i bennu darpariaeth a wneir o dan bwerau sy'n ymwneud â'r UE fel un sy'n parhau i gael effaith);
 - (d) adran 9 (pwerau sy'n ymwneud â chydymffurfedd â rhwymedigaethau rhyngwladol);
 - (e) adran 10 (pwerau i weithredu'r cytundeb ymadael);
 - (f) adran 11 (pŵer i weithredu rhwymedigaethau gan yr UE).
- (2) Caiff rheoliadau o dan y paragraff hwn (ymhlith pethau eraill)—
 - (a) pennu'r ffioedd neu'r taliadau neu wneud darpariaeth o ran sut y maent i'w penderfynu;
 - (b) darparu ar gyfer adennill neu waredu unrhyw symiau sy'n daladwy o dan y rheoliadau;
 - (c) rhoi pŵer i'r awdurdod cyhoeddus i wneud, drwy is-ddeddfwriaeth, unrhyw ddarpariaeth y caiff Gweinidogion Cymru ei gwneud o dan y paragraff hwn mewn perthynas â'r swyddogaeth berthnasol.
- (3) Ni chaiff rheoliadau o dan y paragraff hwn—
 - (a) rhoi swyddogaeth i un o Weinidogion y Goron na gosod swyddogaeth arno;
 - (b) dileu nac addasu swyddogaeth cyn cychwyn un o Weinidogion y Goron oni bai bod gwneud hynny yn gysylltiedig â darpariaeth arall sydd wedi ei chynnwys yn y rheoliadau neu'n ganlyniadol iddi.

Pŵer i addasu ffioedd neu daliadau cyn ymadael

- 2 (1) Mae is-baragraff (3) yn gymwys pan fo is-ddeddfwriaeth yn cynnwys darpariaeth (“y ddarpariaeth codi tâl”) ar gyfer codi ffioedd neu daliadau eraill neu mewn cysylltiad â chodi ffioedd neu daliadau eraill—
 - (a) sydd wedi ei gwneud mewn rheoliadau o dan adran 4 neu sy'n cael ei thrin fel pe bai wedi ei gwneud o dan adran 5, a
 - (b) a oedd, yn union cyn y diwrnod ymadael, wedi ei gwneud o dan adran 2(2) o Ddeddf y Cymunedau Ewropeaidd 1972 neu adran 56 o Ddeddf Cyllid 1973.
- (2) Mae is-baragraff (3) hefyd yn gymwys pan fo is-ddeddfwriaeth yn cynnwys darpariaeth a addesir o dan y paragraff hwn.
- (3) Caiff Gweinidogion Cymru wneud darpariaeth drwy reoliadau sy'n addasu'r is-ddeddfwriaeth at ddibenion—
 - (a) dirymu'r ddarpariaeth codi tâl,

- (b) newid swm unrhyw un neu ragor o'r ffioedd neu'r taliadau sydd i'w codi,
 - (c) newid sut y mae unrhyw un neu ragor o'r ffioedd neu'r taliadau i'w penderfynu, neu
 - (d) newid fel arall y ffioedd neu'r taliadau y caniateir iddynt gael eu codi mewn perthynas ag unrhyw beth y caniateir i ffioedd neu daliadau gael eu codi mewn cysylltiad ag ef o dan y ddarpariaeth codi tâl.
- (4) Caniateir i reoliadau o dan y paragraff hwn gael eu gwneud cyn y diwrnod ymadael os bydd y ddarpariaeth codi tâl yn dod o fewn is-baragraff (1) ar y diwrnod ymadael.

Cyfyngu ar arfer pŵer o dan baragraff 2

- 3 (1) Pan fo'r ddarpariaeth codi tâl yn cynnwys darpariaeth Deddf 1972 yn unig, ni chaiff rheoliadau o dan baragraff 2 osod na chynyddu trethiant.
- (2) Yn is-baragraff (1), ystyr "darpariaeth Deddf 1972" yw—
- (a) darpariaeth o fewn paragraff 2(1)(a) a wnaed yn union cyn y diwrnod ymadael o dan adran 2(2) o Ddeddf y Cymunedau Ewropeaidd 1972 ac nid o dan adran 56 o Ddeddf Cyllid 1973, gan gynnwys darpariaeth o'r fath fel y'i haddesir o dan baragraff 2, neu
 - (b) darpariaeth a wneir o dan baragraff 2 ac sy'n gysylltiedig â darpariaeth o fewn paragraff (a) neu sy'n ychwanegu ati neu yn ei disodli.
- (3) Ni chaiff rheoliadau o dan baragraff 2—
- (a) rhoi swyddogaeth i un o Weinidogion y Goron na gosod swyddogaeth arno;
 - (b) dileu nac addasu swyddogaeth cyn cychwyn un o Weinidogion y Goron oni bai bod gwneud hynny yn gysylltiedig â darpariaeth arall sydd wedi ei chynnwys yn y rheoliadau neu'n ganlyniadol iddi.

Perthynas â phwerau eraill

- 4 Nid yw'r Atodlen hon yn effeithio ar y pwerau o dan adran 3, 4, 5, 9, 10 neu 11, neu unrhyw bŵer arall sy'n arferadwy ar wahân i'r Atodlen hon, i'w gwneud yn ofynnol i ffioedd neu daliadau eraill gael eu talu, neu i wneud darpariaeth arall mewn perthynas â ffioedd neu daliadau eraill.